

李文恭公遺集

李文恭公奏議卷十二目錄

湘陰李星沅石梧著

男

祖祝棟

編次

蘇撫

審結傅志雨控案摺子

甄別知縣摺子

附奏委署長洲吳江等縣片子

審擬因瘋蔑倫重犯摺子

特參疎防監犯印捕官摺子

審擬退卯捕役誣竊爲盜摺子

請將京控咨案提解逾限各員交部議處摺子

附

清單

撫卹琉球難夷摺子

附奏嘆咭喇新派領事到滬日期片子

蘇省道光二十五年地丁奏銷比較分數摺子

審擬陳增控案摺子

審擬荆溪縣民婦小張盧氏被繼姑大張盧氏非
理毆打致自拉棒傷斃一案奏請

聖訓摺子

審擬棍徒頑佃摺子

附奏土棍亟宜嚴懲片子

奏謝補授雲貴總督並遵

旨赴任摺子

審結傅志雨控案摺子

奏爲遵

旨審明定擬恭摺奏祈

聖鑒事竊照江蘇海州民傅志雨以霍其俊等毆傷其子傅開位身死等情赴提督衙門呈控奏奉

諭旨此案著交程喬采親提人證卷宗秉公嚴訊按律定擬具奏原告傅志雨該部照例解往備質欽此當

經臣程喬采查案飭發淮揚道提集人卷訊供各

執據山陽縣獲解唆訟之傅志超到案提同研鞫
不獨被告霍其俊等極口呼冤隣證人等亦僉供
傅開位係被魚骨鯁傷咽喉不能飲食咳血身死
惟傅志雨傅志超堅稱傅開位係被霍四霍其俊
毆打致傷胸背等處殞命臣程昶采提訊取結奏
奉

諭旨飭交江蘇臬司委員檢驗傅開位屍身並無傷痕
行提人卷至蘇委據蘇川府等審明擬議由臬司

周祖植覆審詳解前來臣程喬采督運北上經臣
李星沅就近親提人證逐加研鞫緣傅志雨籍隸
海州傅志超係海州學文生因曠課斥革與傅志
雨係共祖兄弟道光二十三年九月初間傅志雨
因住宅被水挈眷至葦蕩營地方欲在河營兵丁
霍其俊屋旁搭棚栖止霍其俊不允有隣人戴殿
卿係傅志雨之戚代爲另擇空地搭棚住下是月
二十五日傅志雨之子傅開位因食鹹魚骨鯁喉

中不能飲食咳血不止傅志雨聞牙糖可治曾至
戴殿卿家取服無效延至十月初三日咳血身死
戴殿卿念其家貧意欲勸令附近各家公助錢三
十千文以爲棺殮之費均未幫給戴殿卿卽代買
棺殮埋傅志雨挾霍其俊不允搭棚之嫌起意誣
控人命希圖拖累與傅志超商量傅志超從旁慫
恿傅志雨卽以伊子在溝摸魚被霍其俊同弟霍
四毆傷胸背吐血身死情詞竝將戴殿卿前許勸

助錢文捏作已付赴海州具控該州龔善思提集
訊明傅開位實係魚骨鯁傷身死傅志雨亦自認
混控將其杖責完案嗣傅志雨因前忿未洩向傅
志超告知仍圖翻控傅志超以經州審定有案恐
難再准必須架詞上控且須牽扯多人藉可從中
取利傅志雨隨照控州情節將霍其俊同營兵目
徐萬富孫冠州差印儒等牽入指爲受賄局串添
砌戴殿成過付錢文徇情朦斷等詞赴淮海道呈

控未准卽赴前漕臣衙門具告批發淮海道行提
人證未到霍其俊之父霍爾玉查知傅志超唆訟
亦赴學臣衙門指控傅志雨又與傅志超商定仍
照厯控情節裝點道差不容投詞徐萬富勾串捏
控將無干之徐萬賓等及代書州書一并牽砌赴
提督衙門呈控奏奉

諭旨交臣程禡采審辦當經查案飭發淮揚道訪獲傅
志超提訊供詞各執據傅志雨傅志超結求開檢

臣程裔采提訊取結奏奉

諭旨飭交江蘇臬司委員檢驗業經驗明傅開位屍身
無傷委據蘇州府集審由司覆鞫議擬詳解臣李
星沅親提犯證反覆推究據各供悉前情嚴詰霍
其俊等均供竝無出錢局串朦斷勒結各情質之
傅志雨傅志超亦自認挾嫌誣控教唆圖詐不諱
案無遁飾查例載期親以上尊長按律不應抵命
誣告人命致蒸檢卑幼身屍仍照誣告人死罪未

決律治罪又律載誣告人死罪杖一百流三千里
加徒役三年又教唆詞訟誣告人者與犯人同罪
又例載教唆詞訟誣告人之案如本人起意欲告
而教唆之人從旁慫恿者依律與犯人同罪各等
語此案傅志雨因子傅開位被魚骨鯁傷不能飲
食咳血身死乃挾霍其俊不令搭棚之嫌輒行誣
告毆斃迫經訊明杖責復裝點情節屢次妄控繼
又赴京混瀆發回提鞠衆證確鑿猶復固執原詞

以致屍遭蒸檢刁詐已極惟所檢係其子屍按律
不應擬抵應仍照誣告人死罪未決科斷傅志超
爲傅志雨大功堂弟當傅志雨向商屢次慫恿羅
織多人冀圖索詐實屬同惡相濟亦應照教唆之
人從旁慫恿與犯人同罪例問擬傅志雨傅志超
均合依誣告人死罪未決杖一百流三千里加徒
役三年律各杖一百流三千里加徒役三年到配
折責安置傅志超據供母老丁單係教唆誣告情

節較重不准畱養霍其俊霍四曹友壽戴殿成訊
未將傳開位攢毆給錢私和戴殿卿亦未受賄稟
汎均毋庸議無干省釋未到人證概免提質屍骨
飭埋除供招咨部外所有審明定擬緣由臣等謹
合詞恭摺具

奏伏乞

皇上聖鑒勅部核覆施行再該原告在京所具甘結核
案相符合竝陳明謹

奏 道光二十六年七月二十九日具

奏奉

硃批刑部議奏欽此

甄別知縣摺子

奏爲甄別辦事遲鈍之知縣請

旨勒休以重地方恭摺奏祈

聖鑒事竊照知縣爲親民之官必須才具精明辦事勇
往斯爲無忝厥職茲查浦縣知縣雷鴻恩河南廕
生由刑部候補主事改捐知縣選授今職道光二
十五年十一月到任臣等隨時察看該員人本頗
預辦公近多竭蹶卽如承修運河寨子民捻延未

到工督辦雖漕行尙無阻滯而工完計已遲逾又
碭山等縣移解未定罪名匪犯史先等四名在押
脫逃當經嚴飭緝拏日久尙未弋獲其遇事不能
振作已可概見未便因尙無劣蹟稍事姑容據該
管道府詳請撤任前來臣等與藩司徐廣縉臬司
周祖植公同商酌相應請

旨將沛縣知縣雷鴻恩勒令休致俾免貽悞地方除委
員前往按署查明任內經手錢糧有無虧短另行

照例辦理仍勒緝逸犯史先等務獲究報外謹合
詞恭摺具

奏伏乞

皇上聖鑒訓示再所遺沛縣知縣員缺容另遴員請補
合并陳明謹

奏
道光二十六年七月二十九日具

附奏委署長洲吳江等縣片子

再長洲縣知縣陳介眉准升通州知州應行請咨
赴部所遺長洲縣係省會要缺政務殷繁又吳江
縣知縣周沐潤調署上海縣遺缺界連浙江亦關
緊要查有崇明縣知縣熊傳栗堪以調署長洲縣
篆無錫縣知縣吳時行堪以調署吳江縣篆據藩
臬兩司會詳前來除批飭遵照外謹合詞附片陳
明伏乞

聖鑒謹

奏

硃批覽欽此

審擬因瘋蔑倫重犯摺子

奏爲審明因瘋蔑倫重犯按律定擬恭請

王命卽行正法專摺奏祈

聖鑒事竊據蕭縣知縣徐海珍稟報道光二十六年六月二十三日訪有縣民張四傳因瘋砍傷親母張吳氏身死正在飭拏間據保隣孫秉超等將張四傳解縣當經親詣驗明屍傷提訊該犯目瞪口呆神識昏迷患瘋屬實將犯證人等押解來省臣因

案關重大批司飭委蘇州府等督同該縣徐海珍
嚴審究辦去後茲據該委員等審明定擬由臬司
周祖植覆審招解前來臣卽督同藩臬兩司親提
研鞫緣張四傳籍隸蕭縣係張吳氏親子務農爲
業道光二十一年間張四傳染患瘋病醫治未效
時發時愈伊母張吳氏言其從未滋事且係獨子
未經報官鎖禁張四傳家有向南正屋三間東西
廂房各一間張吳氏住宿正屋東間張四傳同妻

傅氏在西首廂房住宿二十六年五月間張四傳因天氣炎熱搬至張吳氏房外正屋中間睡宿夜間不關房門希圖涼爽張傅氏仍住廂房六月二十一日早張四傳瘋病復發拏取鋤刀亂舞張吳氏起身看見喊叫張傅氏進內奪取張傅氏聞聲趕至院內瞥見張四傳已在正屋中間用刀亂砍致傷張吳氏左額角連左太陽穴及咽喉倒地張傅氏喝阻不及并因一人不敢近前奔至大門外

哭喊經隣人張心趕至一同進內張四傳尙在持刀跳舞張心上前將張四傳抱住張傳氏奪下劍刀查看張吳氏已氣絕殞命張傳氏投保將該犯解縣驗明屍傷親押犯證來省委審由司招解臣親提犯證逐一研鞫據犯妻人等供悉前情查驗該犯張四傳目瞪口呆向人癡笑惟據稱砍死伊母及並嚴行詰訊加以刑嚇仍復神識昏迷不能取供瘋病未痊似無遁飾查律載子毆母殺者凌

遲處死又例載子殺母之案無論是否因瘋悉照
本律定擬又瘋病之人隣佑人等容隱不報以致
殺人者照知人謀害他人不卽阻當首報律杖一
百各等語此案張四傳因瘋病復發輒將親母張
吳氏砍傷致死實屬罪大惡極張四傳合依子毆
母殺者凌遲處死律凌遲處死查蕭縣距省在三
百里以外臣於審明後卽恭請

王命飭委臬司周祖植蘇州營參將董占元將該犯張

四傳押赴市曹按律凌遲處死仍將首級解回犯
事地方梟示以昭炯戒地保孫秉超隣佑張心於
張四傳染患瘋病因張吳氏不肯報官亦遂容隱
均合依瘋病之人隣佑人等容隱不報以致殺人
例杖一百折責發落孫秉超仍革役張傅氏救阻
不及應毋庸議屍棺飭埋兇刀貯庫除供招咨部
外所有審明辦理緣由謹恭摺具

奏伏乞

皇上聖鑒勅部查覈施行謹

奏
道光二十六年七月二十九日具

奏奉

硃批刑部知道欽此

特參疎防監犯印捕官摺子

奏爲特參管獄有獄各官疎脫尙未定案監犯請

旨分別革職畱任勒限緝拏恭摺奏祈

聖鑒事竊照署山陽縣知縣劉袒因病出缺所遺山陽

縣印務經署淮安府知府許樾就近飭委南河試

用縣丞王忠寶暫行代理茲據王忠寶稟報遵札

赴工防汛公出道光二十六年七月初一日據典

史謝汝霖稟報寄禁安東縣犯人汪魁乘初一日

五更雷雨大作。竈窟潛逃。追拏無獲。等情。當卽馳回查勘。該犯汪魁係收禁東號第二間。竈開木柵下橫板鑽進。空號在圍牆竈窟潛逃。遺有扭斷鐐鑰一副。鐵櫃一根。訊據刑禁人等僉供實係一時疎忽。竝無私鬆刑具得賄故縱情事。竝據該府許榑督同勘訊。無異具稟前來。臣等查該犯汪魁籍隸山東嶧縣。因在安東縣行竊事主苗玉杭家尙未得贓。被迫拒捕致傷事主。越日身死。經安東縣

審擬斬候解府提勘該犯供係鬪毆殺人並非拒
捕提證質訊未到寄禁山陽縣監尙未解司成招
之犯該管獄有獄各官並不督率刑禁人等小心
防範以致該犯越獄脫逃已越兩旬未據報獲實
屬怠玩更難保無刑禁人等有得賄故縱情事雖
係未經定案之犯未便稍從寬貸據藩臬兩司轉
據該管道府揭報前來相應請

旨將山陽縣典史謝汝霖卽行革職代理山陽縣事南

河試用縣丞王忠寶雖經先期公出但其督率不
嚴致重犯越獄脫逃非尋常疎脫可比應請革職
畱任該員現當交卸仍責令協同現任知縣督飭
謝汝霖勒拏逃犯汪魁務獲如疎防限滿犯仍無
獲另行照例分別參處以爲玩視監獄者戒除飭
司行提刑禁人等來省嚴審有無賄縱按例擬辦
外臣等謹合詞恭摺具

奏伏乞

皇上聖鑒訓示謹

奏 道光二十六年七月二十九日具

奏奉

硃批另有旨欽此

審擬退卯捕役誣竊爲盜摺子

奏爲退卯捕役誣竊爲盜追拏到案遵

旨審明定擬恭摺奏祈

聖鑒事竊照邳州客民劉瑞凝以被盜無獲捕役孟田
明退暗充朋比包庇以有供無贓之張貫五等搪
塞免比等情赴都察院衙門具控奏奉

諭旨此案著交孫善寶親提人證卷宗秉公研訊按律
究辦原告劉瑞凝該部照例解往備質欽此竝准將

原告劉瑞凝遞解回蘇當經前撫臣孫善寶行司
飭提人卷來省委員提訊張貫五等實非此案正
盜因被告孟田在歇脫逃致未訊結各前署撫臣
節次勒拏未獲臣到任後查案嚴飭該管邳州將
孟田拏獲解省據長洲縣等審明錄供由臬司周
祖植覆審解勘前來臣隨親提人證逐加研鞫緣
孟田籍隸邳州曾充該州捕役於道光十四年退
卯劉瑞凝卽劉瑞成向在邳州開張布店道光二

十一年八月二十八日夜劉瑞凝店鋪被盜撞門
進內拒傷劉瑞凝及店夥楊永順刦去銀錢衣物
布疋報經前署知州劉同纓會營勘訊驗傷估贓
通詳飭捕王先石得陳盛勒緝未獲劉同纓於疎
防限內卸事前任已革知州張心淵到任按限參
緝王先等畏比央孟田設法幫捕仍無弋獲孟田
稔知張貫五素行不端與匪往來心疑劉瑞凝案
係張貫五等行刦令王先等將張貫五拏解卽使

審非正盜亦可搪塞比限王先等允從將張貫五
拏住解州提訊張貫五自行誣服竝將素識之沈
科陳銀供爲同夥經該州先後提案質訊沈科忽
認忽翻陳銀堅不承認張貫五又因追究原賊將
身穿馬褂指作賊衣劉瑞凝認非原賊經該管徐
州道府查知嚴飭提同原拏捕役質究詳辦劉瑞
凝亦以供賊不起捕庇案懸等詞赴徐州府暨前
撫臣程裔采衙門具控批飭審辦竝據安徽靈璧

縣以該縣事主王尙文被搶案內獲犯耿八認劫
劉瑞凝之案移解邳州從重審辦該州張心淵提
訊耿八供認聽從周奉夥同趙四等行劫拒捕不
諱提訊張貫五翻異前供竝稱前係畏刑混認質
之耿八亦稱張貫五等委非同夥亦不認識竝據
耿八供出賊衣移調解州傳主認非原物贓證仍
屬未明耿八旋卽在監病故由徐州府飭委睢甯
縣驗無凌虐別故填格通詳陳銀亦因病交保該

州責令王先等另緝周奉趙四各犯王先等仍央
孟田幫拏無獲劉瑞凝即赴都察院具控奏奉

諭旨交審孟田於到官後畏罪脫逃茲經追拏到案委
員審明由司覆審解勘前來臣親提研鞫據各供
悉前情嚴究孟田實止於退卯後幫同緝捕主使
捕役王先等將素行不端之張貫五拏解塘比竝
非平空誣拏亦無包庇匪類情事訊之張貫五等
亦各自認行竊不識姓名事主衣服牛驢不諱其

事主劉瑞凝被刦一案堅執不承請係前在邳州
畏刑混認矢口不移案無遁飾查例載捕役人等
奉差緝賊審非本案正盜若其人素行不端將捕
役照誣良爲盜例減一等杖一百徒三年等語此
案孟田曾充州捕業經退卯因捕役王先等央令
幫同緝捕該犯稔知張貫五素行不端輒令王先
等妄拏摭比殊屬藐法查例內竝無已退捕役幫
緝案件將素行不端之人拏解審非正盜作何治

罪明文自應比例問擬孟田應比照捕役人等奉
差緝賊審非正盜若其人素行不端將捕役照誣
良爲盜例減一等初一百徒三年例杖一百徒三
年該犯被控提省在歇脫逃應加逃罪二等擬杖
一百流二千五百里到配折責安置事犯脫逃在
道光二十五年五月二十四日清刑

恩旨以前到官在後且係已退捕役誣竊爲盜應不准
其援減捕役王先石得陳盛因承緝盜案無獲聽

從孟田將素行不端之張貫五拏解罪應擬徒飭
州另行照例詳辦張貫五沈科訊非正盜應毋庸
議其認竊各案應發回邳州查案擬結原告劉瑞
凝所控得實且已在寓病故孟田在歇脫逃保歇
人等訊無凌虐賄縱情事均毋庸議劉瑞凝被刦
之案飭州嚴緝正盜竝周奉等務獲究辦餘屬無
干免其提質除供招咨部外所有審明定擬緣由
理合恭摺具

奏伏乞

皇上聖鑒勅部核覆施行再該原告在京所具甘結核

案相符合竝陳明謹

奏 道光二十六年八月二十八日具

奏奉

硃批刑部議奏欽此

請將京控咨案提解逾限各員交部議處摺子

明請單

奏爲查明京控咨案提解逾限各員請

旨交部議處恭摺奏祈

聖鑒事竊照京控咨交案件每屆半年應將提解承審
各遲延職名奏參議處江蘇省截至道光二十五
年封印共有未結京控咨案三十九起前經臣督
同兩司嚴飭提解承審各官勒限掃數審結當將
辦理情形縷晰

奏明竝開列提解遲延職名據實指參在案茲查截至二十六年六月底所有前參未結各案業已審結周紹汶等二十九起尙有未結陳俊等十起又續准咨交新案王光明等二十七起業已審結王光明等四起尙有未結朱澱塊等二十三起內除人證已齊現在訊辦及市經行提高義興等十一起尙未逾限外計有陳俊等二十二起均係地方官提解遲延自應照例查參示儆謹將應參職名

繕具簡明清單恭呈

御覽請

旨將金壇縣知縣王清渠等交部照例議處臣仍嚴督
司道勒限催提解省趕緊訊結不任稍有延宕以
仰副

聖主息訟安民至意除將王清渠等遲延月日聲扣明
白另單咨部核議外據該司道等查詳前來理合
恭摺具

奏伏乞

皇上聖鑒謹

奏 道光二十六年八月二十八日具

奏奉

硃批另有旨欽此

謹將江蘇省京控咨案應忝提解遲延職名繕具
簡明清單恭呈

御覽

一金壇縣民陳俊案係金壇縣知縣王清渠

一上海縣監生金振聲案係上海縣知縣藍蔚雯

一安東縣客民甘石奎案係前任安東縣知縣陳

兆鵬

一南匯縣民婦吳淩氏案係南匯縣知縣蕭翀

一南匯縣民張寶玉案係南匯縣知縣蕭翀

一鹽城縣民楊庭針案係鹽城縣知縣楊鳳翮

一海州客民戴義來案係前署海州知州陳在文

一泰州民丁貞基案係泰州知州張之杲

一南匯縣民李心田案係南匯縣知縣蕭翀

一邳州民劉鳳岐案係前任邳州知州董用威代

理邳州知州賴以平

一泰州已革武生朱澱塊案係泰州知州張之杲

一豐縣民孫繼倫案係豐縣知縣陳第誦

一宿遷縣童生楊步達案係前署江都縣知縣張鵬展

一東臺縣民陳雲隴案係前署東臺縣知縣白上

采

一東臺縣民金炫文案係前署東臺縣知縣白上

采

一阜甯縣民工勸案係阜甯縣知縣錢兆麟

一金山縣民王東昇案係金山縣知縣于浚

一蕭縣民馮景沅案係蕭縣知縣徐海珍

一鎮洋縣武生張芳揚案係署鎮洋縣知縣許之

第

一鎮洋縣監生王聖榮案係署鎮洋縣知縣許之

第

一上海縣民沈念祖案係上海縣知縣藍蔚雯

一吳江縣武生湯鎮海案係吳江縣知縣周沐潤

撫恤琉球難夷摺子

奏爲琉球國遭風難夷先後漂至江境照例優加撫恤護送赴閩歸國循例恭摺具

奏仰祈

聖鑒事竊據川沙撫民同知溫綸湛稟據地保報稱六月十六日在圩塘地方見有外夷八人查詢言語不通稟解到廳給與紙筆令其書寫內有一人據書伊名大嶺與三良金城砂門古波籠仲間大領

友奇均係琉球國久米村人本年五月初五日坐船載運粟木棉花等物往宮古島渡地方船內共十一人三人先已上岸伊等於六月初七日在宮古島渡坐原船歸家初九日至久米島遇風漂入大洋十五日至川沙海灘風浪甚大乘坐小腳船上岸大船已被漂沒又據如皋縣知縣白聯元稟准掘港營都司陳施華分防主簿高翔移據防守海汛把總康清泰稟稱六月十六日巡至本港沙

灘見有停泊損壞夷船一隻內有夷人五名轉送
到縣據能書漢字之玉城書稱琉球國護門切地
普瀨村人伊係船戶棚原赤嶺又吉高嶺均係水
手本年閏五月十四日在本國開船出口至宮古
島地方買辦米粟六月初五日猝遇大風漂入大
洋十六日到如皋沙灘各等情稟報前來臣當卽
批司委員迎護來省照例詳辦今據江甯布政使
徐廣縉蘇州布政使陸蔭奎江蘇按察使周祖植

會詳飭據長元吳三縣覆詢明確卽將護送回國
緣由寫給看視該夷等均各懽欣鼓舞叩謝

皇仁所有大嶺等八名乘坐腳船已由川沙廳變價給
領又玉城等五名損壞原船亦由如皋縣優給船
價並分別捐給棉被衣履正在委員請咨間適川
沙廳送到難夷內友奇一名在寓患病撥醫調治
無效於八月初六日病故委員眼同大嶺等驗明
棺殮求將屍棺送回等情請

奏前來臣查外夷遭風漂至內洋歷經護送邊界附搭便船回國今琉球國難夷大嶺等先後漂至川沙如皋地方業經優加撫恤給予衣糧應卽同友奇屍棺一并委員護送起程前赴浙江由陸路赴閩附搭便船回國以仰副

聖主懷柔遠人至意除飭司分別妥辦竝查造該難夷等姓名銀物清冊飛咨閩浙督撫臣飭知地方官逐站接護照料前進暨咨明禮部查照外所有琉

球國難夷漂至江境護送回國緣由謹會同兩江

總督臣璧昌恭摺具

奏伏乞

皇上聖鑒謹

奏
道光二十六年八月二十八日具

奏奉

硃批禮部知道欽此

附奏暎咭喇新派領事到滬日期片子

再臣等前准

欽差大臣耆英來咨據暎咭喇德會照會上海管事之
巴富爾將回本國所遺領事令現任福州管事之
阿利國接管等因當經轉行蘇松太道遵照去後
茲據該道宮慕久申稱暎夷新派來滬之領事阿
利國於八月十六日帶同譯官夏巴由吳淞換坐
小船進口於十八日視事前領事巴富爾於二十

三日帶同原派副使麥華陀由滬起程出口阿利
國至署與該道接見情詞極爲恭順等情前來除
飭該道照會該領事恪遵善後條約及互市章程
妥爲辦理外理合附片陳明伏乞

聖鑒謹

奏

硃批覽欽此

蘇省道光二十五年地丁奏銷比較分數摺子

奏爲江蘇省道光二十五年地丁奏銷蘇藩司屬應
解熟田新賦掃數全完毋庸比較江藩司屬新舊
錢糧并蘇屬舊賦比較上三年完欠分數循例恭
摺奏祈

聖鑒事竊准部咨各直省徵收新舊錢糧比較分數自
道光五年爲始均於奏銷截數後開單奏報並頒
清單式樣歷經遵照辦理在案茲據江甯布政使

徐廣綰詳稱江淮等屬道光二十五年奏銷冊報額徵地丁銀兩除各屬徑支祭品工食秋禾被歉緩徵減則坍江停緩等項外實應徵解銀五十四萬六千七百九十三兩零截至道光二十六年六月底止已完解司銀四十八萬一百六十八兩零內有江甯府屬溢完銀二錢零未完銀六萬六千六百二十五兩零計已完八分八釐未完一分二釐比較道光二十二年計今屆多完三釐比較道

光二十三年計今屆多完四釐比較道光二十四
年計今屆多完三釐又舊賦項下帶徵各年舊欠
銀二十五萬六千九百一十八兩零已完銀四萬
六千三百七十八兩零未完銀二十一萬五百四
十兩零計已完一分八釐未完八分二釐比較道
光二十二年計今屆少完一釐比較道光二十三
年計今屆少完一分五釐比較道光二十四年計
今屆少完二釐又據署蘇州布政使周祖植詳稱

蘇松等屬道光二十五年奏銷冊報額徵地丁銀
兩除徑支撥補秋禾被歉緩徵坍荒占廢註緩候
豁等項外實應徵解銀九十四萬九千六百七十
五兩零截至道光二十六年五月底止全完毋庸
比較分數內已完解司銀九十二萬一千二百一
十一兩零外有溧陽縣溢完銀一釐已完未解署
華亭縣知縣常恩署青浦縣知縣朱瀚徵存虧缺
銀二萬八千四百六十四兩零又舊賦項下帶徵

各年舊欠銀一百七十六萬八千二百五十九兩
零已完銀四十七萬一千一百三十五兩零外有
溢完銀一釐未完銀一百二十九萬七千一百二
十三兩零計已完二分七釐未完七分三釐比較
道光二十二年計今屆少完三釐比較道光二十
三年計今屆少完一分比較道光二十四年計今
屆少完二釐均照頒發式樣將新舊錢糧按年核
明已未完數目開列比較清單請

奏前來臣查江蘇錢糧繁重且因連歲歉收催徵本
非易易疊經嚴飭各屬將二十五年應徵熟田各
項錢糧務於奏銷前掃數解司嗣蘇屬新賦銀兩
業已十分全完其江屬完解新賦亦較上三屆有
盈無絀惟江蘇兩屬舊欠錢糧實緣民力拮据元
氣未復以致完數稍有短少臣仍督飭藩司將未
完銀兩實力催提趕緊徵解不任延欠並令調齊
紅簿串根逐加確核如有參差卽行從嚴參辦仍

將奏銷案內經徵接徵各職名及完欠分數另疏
題報并將本屆完欠各數咨部外理合恭摺具

奏另繕清單敬呈

御覽伏乞

皇上聖鑒謹

奏 道光二十六年八月二十八日具

奏奉

硃批戶部知道單併發欽此

審擬陳增控案摺子

奏爲遵

旨審明定擬恭摺奏祈

聖鑒事竊照昭文縣民陳增以革書薛正安等把持漕
務浮收勒折監生蔡五等朋充經造攬納漕糧等
情赴都察院呈控咨回審辦經前署撫臣陳繼昌
行司提審未到臣抵任後訪知常熟縣花戶近有
大小名目并有矜監充當經造情事卽經查案委

員將被控之蔡廷熊卽蔡三等提解來省訊供支
飾奏奉

諭旨前任直隸獻縣知縣蔡廷熊著暫行革職武舉浦
登彪著暫行斥革研訊明確定擬具奏等因欽此旋
據蔡庭訓卽蔡五等自行赴省投首催集全案人
証由蘇州府等審明錄供解經藩臬兩司覆審解
勘前來臣親提犯証逐加研鞫緣蔡庭訓卽蔡五
浦大田卽浦楠徐政心均籍隸常熟薛正安籍隸

昭文徐政心係常熟縣漕書薛正安本名薛瑞安
前充昭文縣漕書緣案問擬杖革昭文縣歷年漕
書錢坤吉等因薛正安熟悉漕務每當收漕時皆
向詢訪商辦該二縣地方遼濶鄉僻零星小戶應
完漕米難於跋涉間有托令田多大戶順便帶完
之事遂有大小戶名目蔡庭訓之兄告病在籍知
縣蔡廷熊及浦大田之子武舉浦登奎浦登彪素
爲鄉戶帶完漕糧鄉戶田畝係自種自收米均乾

潔蔡廷熊等田畝係交佃戶耕種還租米多潮雜
因以租米易換鄉戶之米赴倉掇交併時有掛欠
嗣因鄉戶托完者衆蔡廷熊不勝其煩浦登奎等
又北上會試不復經手各鄉戶卽託蔡庭訓浦大
田代完蔡庭訓浦大田起意乘機誑騙卽捏稱漕
糧現須津貼四處包攬于正額外各自多收費用
侵蝕入已并因查造糧冊推收過戶等事應由
經造辦理伊等包攬誑騙難掩經造耳目卽詭名

充當經造以免發覺又慮地方官查訪遂與徐政
心薛正安交通往來餽送禮物托爲照應徐政心
等貪得餽遺各爲設法包庇蔡庭訓自道光二十
二年起每年包攬米一百八十餘石計侵騙錢二
十七八九千不等至二十四年共侵騙錢八十五
千五百文浦大田自二十一年起每年包攬米一
百五十餘石計侵騙錢二十三十四五千不等至二
十四年共侵騙錢九十六千四百文又有增貢生

顧文虎職貢生曹毓德明知薛正安係已革漕書
干預漕務先後向薛正安徐政心索取漕規並未
入手陳增亦有應完漕米二十四年秋間該縣等
辦理歉收緩徵陳增不知熟田漕米並不展緩往
懇漕書徐萬長等註緩徐萬長等因查陳增田畝
係在熟區向其回覆陳增卽以薛正安更名頂充
與常熟縣書通同一氣串合蔡庭訓等朋充經造
包攬勒索移荒浮收各情詞將蔡廷熊浦登彪等

一併牽砌赴都察院呈控咨回審辦經臣訪查積弊將蔡廷熊等據案奏參奉

旨革審茲據訊擬詳解前來臣親提覆鞫據供前情不諱反覆推究各供不移案無遁飾查律載攬納稅糧者杖六十註云多科費用以誑騙論又誑騙人財物者計贓准竊盜論又竊盜贓八十兩杖九十徒二年半九十兩杖一百徒三年又倉庫攢攔斗級若知侵欺盜用匿而不舉及故縱者與犯人同

罪又例載聞拏投首之犯於本罪上減一等科斷
各等語此案蔡庭訓等包攬漕糧多收錢文殊屬
貪詐應各按律問擬蔡庭訓卽蔡五誑騙錢八十
千零計贓八十兩浦大田卽浦楠誑騙錢九十千
零計贓九十兩除詭名充當經造輕罪不議外蔡
庭訓應革去監生請依攬納稅糧多科費用以誑
騙論誑騙人財物計贓准竊盜論竊盜贓八十兩
律杖九十徒二年半聞拏投首減一等杖八十徒

二年浦大田革去監生照竊盜贓九十兩律杖一百徒三年各定地發配折責充徒誑得錢文照追入官徐政心係現充常熟縣漕書薛正安係已革漕書均屬不知歛蹟狡黠爲奸且明知蔡庭訓等包漕侵騙受餽包庇實爲漕務之蠹應各比照倉庫攢攔斗級若知侵欺盜用匿而不舉及故縱者與犯同罪律應與浦大田同罪各杖一百徒三年係蠹書朋比藉漕作奸酌加一等俱杖一百流二

千里薛正安雖年逾七十若仍畱原籍必再盤踞
滋弊應不准其收贖與徐政心各到配折責安置
陳增所控蔡庭訓等包攬漕米朋充經造雖審得
實惟不在本省衙門具控輒赴京越瀆且其餘情
詞亦多不實應照申訴不實律杖一百折責發落
蔡廷熊曾任知縣浦登奎浦登彪身係武舉輒藉
鄉戶托帶完漕攬和捏交均屬不知自愛應各照

違

制律杖一百蔡廷熊浦登彪業已

奏革浦登奎亦請革去武舉均免發落增貢生顧文
虎卽顧葦莊廩貢生議叙鹽知事職銜曹毓德訊
無包攬浮勒情事惟曾向漕書訛索漕規雖未入
手亦屬有虧行止應各照不應重律杖八十一併
斥革免其發落已選敎諭蔡廷熙武舉浦登鰲均
先外出不知蔡庭訓等包漕誑騙情事應免置議
常熟縣漕書徐萬長於陳增向懇註緩時竝不明

白相告致釀京控亦請照不應重律杖八十折責
革役縣書錢庚等訊無聽串浮勒及私造大斛情
事均毋庸議歷年漕書錢坤吉等因薛正安熟悉
漕務任聽干預均有不合飭縣按名查提責革蔡
庭訓等包攬漕糧訊係畸零小戶附託完納其加
給費用亦被蔡庭訓等誑騙所致請免提議常熟
昭文二縣既有包漕積弊嗣後無論城鄉花戶均
令親自赴倉一律輸將不准再有代完及大小戶

名目其經造一役應由縣官選舉誠實農民充當
不准書役矜監詭名承充并藉口缺底私相頂賣
現爲蔡庭訓等詭充各役一併斥革另僉以杜弊
端蔡廷熊等掛欠漕尾業據在縣繳清陳增未完
昭文縣漕米查明飭追徐政心等收受禮物訊無
確數請免追繳業已訊明未到人証概免提質除
供招咨部外謹會同兩江總督臣壁昌恭摺具
奏伏乞

皇上聖鑒勅部核覆施行再該原告在京所具甘結核

案不符合併陳明謹

奏 道光二十六年九月初六日具

奏奉

硃批刑部議奏欽此

審擬荆溪縣民婦小張盧氏被繼姑大張盧氏非
理毆打致自拉棒傷斃一案奏請

聖訓摺子

奏爲繼姑誘媳同陷邪淫不從非理毆打致自拉棒
傷斃審明定擬恭摺奏請

聖訓事竊據署荆溪縣知縣陳洙稟民婦小張盧氏因
被繼姑大張盧氏用竹棒毆打捧住求饒大張盧
氏不依拉回致自戳傷左脇跌地身死等情臣因

案關倫紀批飭將犯証押解來省飭委蘇州府等
督同該署縣嚴審究辦去後茲據該委員等審明
定擬由臬司周祖植覆審招解前來臣親提研鞫
緣小張盧氏籍隸荆溪大張盧氏係小張盧氏繼
姑大張盧氏之夫張瀾奎已故小張盧氏之夫張
信可係張瀾奎前妻所出向均隨侍張瀾奎之父
張升林同居共炊小張盧氏姑媳素稱和順道光
二十二年七月大張盧氏雇機匠周墩觀在家織

布遂與周墩觀姦好張升林等均未知情嗣被小
張盧氏撞破大張盧氏慮爲張揚欲誘同陷邪淫
是月二十八日黃昏張升林張信可同大張盧氏
之子張三大赴地看守梨園小張盧氏尙在廚房
大張盧氏卽令周墩觀乘間潛至小張盧氏房內
睡卧圖姦迨小張盧氏進房瞥見喊嚷周墩觀逃
出小張盧氏當卽趕向張升林等訴知張升林等
卽邀同族眾張方大張安奎張和奎回家欲將周

墩觀送官究治周墩觀卽以大張盧氏主使前往
之言實告大張盧氏亦無可支飾張升林因係家
醜當向大張盧氏訓斥并將周墩觀攆逐寢事大
張盧氏因此懷憾時將小張盧氏凌辱又經張升
林主令姑媳分炊大張盧氏仍不時借端毀詈小
張盧氏均爲順受周墩觀住近大張盧氏母家大
張盧氏歸省時常找周墩觀閑談因無隙可乘未
經續舊二十六年六月初四日張信可張三大赴

田工作大張盧氏站立門首見周墩觀路過邀令
進內坐歇周墩觀恐張升林等撞見未允適小張
盧氏走至向大張盧氏婉言勸阻大張盧氏惱羞
成怒遂藉稱小張盧氏前曾採伊桑葉未經給錢
卽與竊賊無異逼令付錢辱罵並取竹棒欲毆小
張盧氏畏懼逃回房內大張盧氏趕進舉棒向毆
因房屋逼窄無處躲避小張盧氏將棒頭捧住哀
求饒恕維時張升林聞鬧趨至喝勸大張盧氏不

依將棒拉回小張盧氏病後乏力站立不穩身向前撲不期大張盧氏拉回勢猛致棒頭自行戳傷左前脇倒地墊傷右後肋大張盧氏之童養媳任氏亦卽踵至幫同小張盧氏將其扶卧床上詎大張盧氏傷重移時殞命報縣驗訛通稟押帶犯証至省委審供悉前情再三究詰衆供不移似無遁飾查律載毆夫之母殺者凌遲處死等語此案小張盧氏因繼姑大張盧氏持棒向毆無可逃避捧

住棒頭求饒大張盧氏將棒拉回自行戳傷左前
脇跌地身死倫紀攸關應按律問擬小張盧氏合
依毆夫之母殺者凌遲處死律凌遲處死再大張
盧氏與周墩觀通姦被小張盧氏窺破誘陷邪淫
不從經其翁將周墩觀趕逐大張盧氏輒逞忿將
小張盧氏屢次凌辱實屬大虧姑道小張盧氏順
受無違不獨眾供確鑿卽大張盧氏之子若弟亦
無異詞迨大張盧氏仍欲招引姦夫至家小張盧

氏婉言勸阻卽被非理毆打無可躲避捧棒求饒
亦無爭奪情形傷由拉棒自戳死係淫悍繼姑核
與尋常無故逞兇干犯者不同查道光十三年有
陝西省謝楊氏毆砍伊姑謝胡氏身死一案聲明
謝胡氏先經抑媳同陷邪淫後又貪利縱姦該氏
將其毆斃奉

旨謝楊氏著改爲斬立決欽此互相比核小張盧氏情
節較輕相應據實聲明恭候

欽定周墩觀彖於大張盧氏通姦敗露被逐不敢再往
大張盧氏復向招引該犯亦未應允惟曾聽從欲
誘小張盧氏同陷邪淫未便僅科姦罪應酌量加
等間擬周墩觀應請於軍民相姦姦夫枷號一個
月杖一百例上酌加一等杖六十徒一年據供親
老丁單是否屬實飭縣另行查辦大張盧氏本干
例擬業已身死應毋庸議張升林查知周墩觀與
伊媳大張盧氏通姦因家醜不願張揚即將周墩

觀揮逐寢事尙無不合應與張方大等均免置議
張信可於伊妻小張盧氏被繼母毆打時赴田工
作並未在場追聞大張盧氏身死卽與張三大趕
回同往報驗亦請免議無干省釋屍棺飭埋兇器
竹棒發回銷燬除將供招咨部外理合恭摺具
奏伏乞

皇上聖鑒勅部覈覆施行謹

奏
道光二十六年九月初六日具

奏奉

硃批刑部速議具奏欽此

審擬棍徒頑佃摺子

奏爲棍徒肇衅生事拒捕致死眼線并頑佃效尤打
毀業戶獲犯審擬恭請

王命將商謀首犯先行正法專摺奏祈

聖鑒事竊照昭文縣鄉民至己革漕書薛正安家滋鬧
因薛正安赴縣喊稟該鄉民卽隨赴縣署喧嚷并
有佃戶因還租爭價輒鳴鑼聚眾打毀業戶多家
一案經臣李星沅附片

奏明先將查辦不力之知縣毓成撤任一面飭委署撫標中軍參將恩長會同蘇州府知府桂超萬并咨會福山鎮總兵孫雲鴻就近督率文武印委各員協力搜拏去後旋據先後報獲金得順等各犯解省飭委蘇州府會同候補知府鍾殿選審明定擬由司覆審詳解前來臣李星沅督同藩臬兩司親提各犯悉心研鞫緣金得順等六十三犯均籍隸昭文金得順幼本無賴披剃爲僧不守清規還

俗行醫並無糧產餘俱耕作度日道光二十五年
十月間昭文縣已革漕書薛正安曾邀金得順診
病就痊金得順卽欲夤緣作奸包漕漁利央懇薛
正安代爲包庇薛正安回覆未允金得順心懷忿
憾稔知薛正安現在干預漕務計圖藉端挾制適
有季萃萃先因完納漕糧與薛正安爭吵有嫌二
十六年正月金得順與季萃萃會遇彼此談及欲
與薛正安尋衅金得順聲稱若不激動衆怒薛正

安不知畏懼二十五年分昭文縣秋收歉薄已奉
膽黃將歉收地方分別緩徵鄉愚口不識丁可以
捏稱全奉豁免薛正安舞弊差追慫惑眾聽去與
薛正安吵鬧出氣季萃萃復以此事必須寫貼傳
單方能互相傳播卽寫傳單十餘張與金得順同
向現獲之曹明吳三鬚子錢倡季銀方曹雙全告
知囑令四處分貼糾人定期進城曹明等允從轉
糾現獲之吳二楊關榮錢春沈受南胡耀胡木生

邵明陶金盛季三金全陸勝發在逃之居得金於
二十一日會齊金得順季萃萃復在路逼令現獲
之沈苗順顧關二季四全張開榮季六大季了頭
鄧四未獲之吳叙三吳關關王幅受季大順季大
受趙方吳正南吳登可文關順跟隨同行一共三
十五人下午進城先赴薛正安家滋鬧因聞薛正
安赴縣喊稟沈苗順等俱畏懼先逃金得順等卽
主令曹明等至縣署大堂同聲喧嚷欲見薛正安

理論因觀看人多致將大堂暖閣柵欄擠壞該前
縣毓成飭差查拏將鄧四追獲解府其餘各犯均
各逃散二月初九日差覓眼線錢汶奎陸大啟下
鄉訪緝金得順聞知商同季萃萃糾人毆打使差
不敢往拏仍糾曹明吳三鬚子錢倡季銀方曹雙
全將錢汶奎陸大啟尋獲一同拉至彭家橋地方
金得順季萃萃喝同曹明吳三鬚子錢倡季銀方
曹雙全各用鋤頭亂毆致傷錢汶奎脊背等處陸

大啟頭上等處倒地因人多手亂均未看清何人
毆傷何處陸大啟等當各殞命金得順與錢倡曹
雙全將屍抬棄海中滅跡十一日金得順傳聞職
員陳茂堂奉官暗購線勇協力拏人卽與季萃萃
商議仍糾曹明吳三鬻子錢倡季銀方曹雙全轉
邀現獲之徐關勝張桂賢吳二楊關榮錢春沈受
南胡耀胡木生陸勝發在逃之居得金同至陳茂
堂家將其牆垣傢伙打毀並未搶取財物因查拏

嚴緊四散逃避後聞知縣毓成業已撤任以爲緝捕可寬逐漸潛回經署知縣何士祁將沈受南等拏獲解府究出首要各犯姓名蹤跡於七月二十二日親帶兵役下鄉搜捕金得順與季萃萃商同糾人抗拒仍令曹明吳三髻子錢倡季銀方曹雙全知會附近鄉民以鳴鑼爲號均須出人幫助如有畏避不到先行拆屋毆打金得順季萃萃又囑曹明等轉糾已獲之張桂賢雷隴海張得保在逃

之吳雙陸錢小曾周汶先赴路口瞭望見有兵役
赴鄉卽通知金得順等鳴鑼糾眾同至路口吶喊
抗拒井有不識姓名多人隨同附和嗣因見係知
縣親身前往當各畏懼逃散此金得順希圖夤緣
包漕不遂商同季萃萃肇衅聚眾滋鬧打毀拒斃
眼線二命聞拏抗拒之情形也昭文縣佃戶應還
業戶麥租向由業戶議定價值畫一折收由來已
久有已獲之王四麻子金三桂於二十六年五月

十六日與在逃之張榮榮張坤大會遇張榮榮言
及金得順等聚衆滋鬧人皆側目現在麥價甚賤
各業戶收取租價不肯減讓心懷不甘起意效尤
寫貼揭帖約會衆佃挾制各業戶減價收租如不
依允卽糾衆打毀王四麻子等允從張榮榮令在
逃之唐萬一寫就揭帖交王四麻子等各處分貼
十九日張榮榮因未見各業戶知會減租卽與王
四麻子金三桂張坤大商定糾人打毀以鳴鑼爲

號王四麻子等隨轉糾已獲之張關通徐關榮江
小五霍關通霍二二蔣萃年陶增幅黃得王大皇
甫五袁方袁金朱耀如朱潮榮周關保皇甫庭祿
王金料於二十一日會齊張榮榮鳴鑼領頭王四
麻子金三桂張坤大亦鳴鑼押同張關通等隨後
行走張榮榮見有現獲之陶香香黃奎徐關潮戴
得二宋元一王二徐二在田工作卽令王四麻子
等向其喊稱如不跟隨同往一併拆屋毆打陶香

香等畏懼隨行共二十八人走至歸市等處張榮榮喝令王四麻子等先後將歸令瑜歸璋鄭方叔鄭兆馨歸清福鄭世勲鄭德懋馬以謙顧載錫等家房屋牆垣什物打毀陶香香等均畏懼先逃並未動手二十二日張榮榮因各業戶仍無減租信息復又鳴鑼領頭王四麻子等押同張關通等跟隨同行張榮榮見有趙小富吳阿二蘇惠隴吳大榮毛金得沈年年黃榮周和尙在田工作又令王

四麻子等上前糾邀趙小富等不允張榮榮聲言
先拆房屋趙小富等畏懼同行共二十九人走至
東周市等處張榮榮喝令王四麻子等先後將瞿
鑾顧裘程照歸耿光黃承煊顧穎徐惠芳王仁基
王仁培王朱氏王畏三柳青發胡毓麟顧錦雲徐
煥徐允昌黃淳司馬江氏司馬朱氏瞿廷埇王萬
堂劉仁傑高宗誠高德培董啟文朱福昌顧士明
等家房屋什物一併打毀不知被何人將程照王

畏三及徐煥家雇工汪茂毆傷旋即平復趙小富等俱畏懼先逃並未動手各業戶報縣勘驗飭拏張榮榮復糾同王四麻子等鳴鑼聚衆欲圖拒捕該差等因見人多勢兇當卽轉回此又王四麻子等聽從逸犯張榮榮張貼揭帖挾制減租未遂打毀業戶不服拘拏之情形也卽經該府親詣會督委員營縣先後獲犯解省訊供通詳議擬招解臣親提覆鞫據各供悉前情不諱詰無起衅別情及

另犯行兇爲匪不法此外亦無同夥滋鬧之人案
無遁飾查例載直省刁民假地方公事強行出頭
逼勒平民約會抗糧聚衆至四五十人照光棍例
爲首擬斬立決爲從擬絞監候等語此案金得順
欲懇己革漕書薛正安包庇攬納稅糧不遂輒藉
季萃萃與薛正安挾有宿嫌商同捏稱漕糧奉豁
薛正安舞弊催追寫貼傳單糾衆滋鬧并赴縣署
喧嚷拒斃眼線錢汶奎等二命打毀陳茂堂家房

屋聞拏抗拒實屬目無法紀該二犯迭次其謀滋事厥罪惟均應一例問擬金得順季萃萃俱應比照刁民假地方公事强行出頭逼勒平民約會抗糧聚眾四五十人照光棍爲首擬斬立決例俱擬斬立決金得順本係無賴棍徒希圖包漕不遂造言肇衅激成眾怒季萃萃起意寫貼傳單同惡相濟若非該管知府辦理得宜幾致釀成鉅案昭文濱海之區此風斷不可長

臣

李星沅於審明後卽

恭請

王命飭委臬司周祖植撫標中軍參將恩長將該二犯
押赴市曹先行正法臬取首級解赴犯事地方懸
竿示衆以昭炯戒曹明等屢次聽從糾人滋鬧幫
毆眼線錢汝奎等致斃均屬爲從應各按例問擬
曹明吳三髻子錢侶季銀方曹雙全合依爲從例
俱擬絞監候王四麻子等聽從逸犯張榮榮效尤
張貼揭帖約會衆佃挾制減租未遂打毀業戶至

三十六家之多迫經差拏復圖糾眾拒捕該縣民情獷悍動輒聚眾兇鬧將來首犯張榮榮就獲應從重照光棍例擬以斬決王四麻子等爲之轉糾多人實屬助惡王四麻子金三桂均應比照刁民假地方公事强行出頭逼勒平民約會抗糧聚眾四五十人爲從例均擬絞監候曹雙全金三桂業已在監病故應毋庸議餘俱秋後處決吳二楊關榮錢春沈受南胡耀胡木生邵明陶金盛季三金

全陸勝發徐關勝張桂賢雷隴海張得保俱被曹
明等轉糾或同至薛正安家滋鬧復赴縣署喧嚷
或聽從打毀陳茂堂家房屋或聽從拒捕未成核
與曹明等情節稍輕未便概擬縲首自應酌減問
擬吳二等十五犯應請於曹明等絞罪上酌減一
等各杖一百流三千里張關通徐關榮江小五霍
關通霍二二蔣萃年陶增幅黃得王大皇甫五袁
方袁金朱耀如朱潮榮周關保皇甫庭祿王金科

俱被王四麻子等轉糾聽從打毀業戶亦應酌減
問擬張關通等十七犯應請於王四麻子等絞罪
上酌減一等各杖一百流三千里陸勝發周關保
皇甫庭祿王金科俱在監病故應毋庸議餘俱到
配折責安置徐關勝尙有聽從前獲擬結之徐二
蠻等打毀運丁王學汾等帳船房屋一案罪名相
等應歸此案擬結各犯所供親老丁單情節較重
應不准其查辦畱養沈苗順顧關二季四全張開

榮季六大季了頭鄧四陶香香黃奎徐關潮戴得
二宋元一王二徐二趙小富吳阿二蘇惠隴吳大
榮毛金得沈年年黃榮周和尙均訊係被脇隨行
旋各畏懼逃回並未在場助勢俱請照被脇同行
例各杖一百折責發落交保管束已革漕書薛正
安干預漕務致令棍徒有所藉口業於陳增京控
案內從重擬流應歸彼案完結昭文縣知縣毓成
於金得順激衆滋事時不能迅速撲捕實屬庸懦

無能未便因其撤任後隨同獲犯稍從寬貸相應
請

旨將昭文縣知縣毓成卽行革職以爲任事玩愒者戒
嗣後業戶收租均按照時值公平收取以杜爭執
曹雙全等在監病故刑禁人等訛無凌虐情弊應
毋庸議監斃職名飭查另參屍棺飭屬領埋打毀
房屋什物照估追賠逸犯張榮榮等飭緝獲日另
結除供招咨部外謹合詞恭摺具

奏伏乞

皇上聖鑒勅部議覆施行謹

奏 道光二十六年九月初六日具

奏奉

硃批另有旨欽此內閣奉

上諭壁昌等奏審辦棍徒糾眾拒捕一摺江蘇昭文縣知縣毓成於土棍金德順激眾滋事不能迅速撲捕實屬庸懦無能著卽革職以爲任事玩愒者戒餘著

刑部議奏欽此

附奏土棍亟宜嚴懲片子

再江蘇濱海之區風氣向稱獷悍又鹽匪沙匪出沒無常動輒勾結滋事昭文自二十二年卽有土棍徐二蠻等聚眾抗租焚燒運丁船隻並打毀業戶多家經前撫臣審明照律治罪在案無如俗尙鬪狠日久未除現在金得順等一案核其起衅甚微竟敢糾約拒捕肆行不法地方官稍不詳愼卽爲浙江奉化之續節飭該府縣會營設法兜拏首

從悉獲自應從重究辦示儆將來查太倉州毗連
昭文尙有濱海鄉民打毀文生錢鼎銘家一案情
節雖輕亦卽效尤之漸業經緝獲各犯提省確審
究擬不任稍有枉縱當此水懦民玩積習囂凌惟
有遇事嚴懲寬猛相濟旣防操切尤戒姑容以期
除暴安良勉副

聖主綏靜閭閻至意謹

奏

硃批務當嚴行懲辦不可遷就姑息欽此

奏謝補授雲貴總督並遵

旨赴任摺子

奏爲敬陳微臣感悚下忱叩謝

天恩仰祈

聖鑒事竊臣於道光二十六年九月初六日接准吏部

行知八月二十三日內閣奉

上諭雲貴總督著李星沅補授卽馳驛前赴新任江蘇
巡撫著陸建瀛調補李星沅未到任以前雲貴總督

著陸建瀛兼署俟李星沅到後卽馳驛前赴江蘇巡撫新任均無庸來京請訓等因欽此聞

命自

天悚息無地伏念

臣

孤寒末學倖列詞曹由編修外用

知府仰邀

聖主特達之知踰分溢量十年浮升巡撫自陝西調補江蘇受事以來夙夜兢惕力小任重報稱無能迺復渥荷

綸音擢授雲貴總督查雲貴地當邊要人才蔚興總督
職在兼圻官方整率民隱何以周恤營制何以精
嚴礦厰何以清釐漢回何以輯睦習俗沿爲風氣
何以漸化牛叢幅員廣於土流何以遠綏象譯臣
質本庸愚更事日淺彌懼弗克勝任上負

鴻慈惟有勵己率屬開誠集思勉期因地制宜矢公矢
慎稍酬

高厚生成於萬一茲於九月十一日交卸江蘇撫篆卽

遵

旨馳驛赴任所有微臣感悚下忱理合恭摺叩謝

天恩伏乞

皇上聖鑒謹

奏 道光二十六年九月十二日具

奏奉

硃批知道了欽此